

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya

No. Telefon : 03-8882 5562
No. Fax : 03-8882 5569

SERI KEMBANGAN, 23 JUN 2019 - Pada pukul 4 pagi hari ini, saya telah melawat Pasar Borong Selangor bersama pegawai-pegawai Penguatkuasa Kementerian Perdagangan Dalam Negeri dan Hal Ehwal Pengguna (KPDNHEP) untuk melihat sendiri aktiviti jual borong di sini. Ketua Setiausaha Kementerian, Datuk Muez Abdul Aziz dan Ketua Bahagian Penguatkuasa, Dato' Iskandar Halim turut serta sekali dalam pemantauan ini.

Tujuan pemantauan adalah untuk meneliti pergerakan harga barang selepas tamat tempoh pelaksanaan Skim Harga Maksimum Musim Perayaan (SHMMP), kepatuhan terhadap undang-undang pengguna, kualiti barangan yang dijual serta mendapat maklumbalas secara terus daripada peniaga dan pengguna.

Hasil pemantauan mendapati harga barangan yang dijual di sini dalam keadaan stabil dan munasabah. Bekalan juga mencukupi dan barangan jualan berkualiti tinggi. Saya mendapat maklum balas langsung dari pemborong dan peniaga di sini yang mengeluh untuk mendapatkan pekerja tempatan bagi menjalankan operasi perniagaan di premis mereka walaupun menawarkan gaji yang berpatutan. Saya akan mengangkat penemuan ini ke platform yang sesuai untuk pihak Kerajaan melihat isu ini dengan lebih mendalam.

Saya ingin mengingatkan para peniaga supaya tidak menaikkan harga sewenang-wenangnya walaupun tempoh SHMMP telah berakhir. Peniaga juga harus patuh terhadap undang-undang pengguna yang berkuatkuasa seperti meletakkan tanda harga dan memastikan timbang sukat tepat.

Saya serta pegawai-pegawai Penguatkuasa kementerian akan meneruskan pemantauan secara kerap bagi menangani sebarang pencatutan dan menjaga kebajikan pengguna. Tindakan tegas akan diambil terhadap mana-mana peniaga yang didapati mengambil kesempatan.

Bagi pengguna pula, saya minta supaya menjadi pengguna bijak dan laporkan kepada kementerian sekiranya mendapati sebarang kenaikan harga secara mendadak atau ketidakpatuhan terhadap undang-undang pengguna. Antara saluran yang boleh digunakan adalah saluran WhatsApp kementerian iaitu 019-2794317.

Pengguna juga harus membudayakan amalan pengguna bijak seperti peka terhadap hak pengguna dan melakukan perbandingan harga semasa membeli bagi mendapatkan nilai terbaik. Dalam usaha ini, aplikasi Price Catcher yang dibangunkan oleh kementerian dapat membantu.

Diharapkan berkat kerjasama semua pihak, kos sara hidup di Malaysia akan terus kekal berpatutan.

#####

DATUK SERI SAIFUDDIN NASUTION BIN ISMAIL
Menteri Perdagangan Dalam Negeri dan Hal Ehwal Pengguna
PUTRAJAYA

23 Jun 2019